

QUÆSTIO MEDICA,

*Quodlibetariis disputationibus manè discutienda in Scholis
Medicorum, die Jovis 17. Decembris 1711.*

M. MATHÆO DIONYSIO FOURNIER,
Doctore Medico, Præside.

An febribus malignis minùs tuta Alexipharmaca?

I.

MALIGNÆ febres, quod præter speciem sæviant & hanc plus habeant in recessu quam in fronte certam, causæ morbificæ & inde ortorum affectuum conditionem arguunt, undè febres ab innatâ indole & nocendi consuetudine graviora symptomata summumque periculum inferunt. Hæc autem licet multiplicia sint & omnino diversa; in omnibus tamen virium prostratio, eaque vel in primâ febris invasione, pulsus ut plurimum parvus ac debilis, non rarè intermittens, modò magnus, modò durus, modò ad statum naturalem accedens; urget intensus capitis dolor, vigiliæ aut sopor, anxietas, delirium, tendinum subsultus, & convulsiones; modò febricitantes torquet inexhausta sitis, modò vomitus, singultus, cardialgia aut syncope, nonnumquam lateris dolor punctorius, tussis acerrima, calor interiùs deurens, arescente linguâ & faucibus, interdum citrà ullum ariditatis sensum, modò stillicidia per nares superveniunt, persæpè alvi fluxus, urinæ ut plurimum sanorum urinis simillimæ, sæpiùs crudæ, modò turbidæ excernuntur; huc accedunt Parotides, Bubones, Tubercula, Carbunculi, ac interdum Sphacelo partes corripuntur; sudores modò colliquativi, modò nulli, modò subacidum redolentes, modò falsum nidorosum ac cadaverosum odorem spirantes. Hæc symptomata modò plura, modò pauciora concurrunt, ac diversimodè complantur, variasque tunc malignæ Febres ab adjunctis exterius sortiuntur appellationes: sic Febres Petechiales, à Petechiis, seu maculis in toto corporis habitu efflorescentibus; à tuberculis minoribus erumpentibus, Morbilli; à tuberculis majoribus suppurantibus, seu pustulis totam cutim deturpantibus & desquamantibus, Variolæ; ab excretionem cutis miliari rubente, Purpuræ habentur.

II.

TANTATot symptomatum diversitas ex vario fermentationis sanguinis gradu sobolescit, diversaque fermenti mole ac figurâ, quibus & diversimodè liquatur sanguis, diversoque concursu principiorum, recrementitii & excrementitii humores diversas sortiuntur labes, undè & functionum labefactatio diversaque producta morbosa erumpunt. Quocumque modo solutâ sulphureâ sanguinis compage, illicò & disfluant spiritus, labanturque vires necessum est. At inusta labes partibus solidis corporis, in productis Anthracibus, &c. humores aquarum stygiarum naturam æmulantes arguit; sive ergò fermentum ad falsum acidum vergat aquæ forti analogum, sive ad falsum acre & aquæ regię similis,

peræquæ labem inuret sanguini & partibus solidis, illarumque texturæ fibrosæ dissolutionem molietur gravissimæque inducet symptomata, licet plurimum inter se diversâ penès molem & figuram fermenti ac fermentationis modum.

I I I.

LICET æris vehiculo sanguis in pulmonibus effluvis quibuscumque heterogeneis alterari possit, seu Mineralium, seu Vegetabilium, seu Animalium putrescentium, quæ caloribus motu, seu solari, seu intrinseco terræ, in æra resolvuntur, atque hinc persæpe fermentum Febrium malignarum salsoacidum aut falsum acre sanguinem inficiat brevî dissolvendum; frequentius tamen fermentum illud falsum coalescit ex falso transpirationis, repentinâ ambientis æris mutatione aut frigiditate, in sanguinem suppresso, quod falsum suâ naturâ volatile frigore densatur, ac modò nubit salibus acidis aut alkalinis, majoremque molem, ac fixitatem adeptum, tantò citius texturam sanguinis fundit & colloquat, quantò majori motu præ majori soliditate jactatur; sicque ventorum contrarietates, tempestatum inæqualitates ac intemperies, uno verbo alterationes subitanæ æris fecundæ matres febrium malignarum. Cum verò alterationes & modificationes æris diversæ, præ diversis tempestatibus, diversimodè corpus exteriùs sanguinemque inficiant, non mirum si productum falsum modo acidum modo acre redoleat, diversamque nanciscatur molem ac diversos motus producat in sanguine, undè tam varia oborientur symptomata; & quoniam eadem modificationes aut repentinæ æris mutationes ad aliqualem distantiam & certam terræ plagam propagantur ac similiter plerorumque incolumata corpora alterantur, planum est hac causâ abortas malignas febres epidemicè grassari. Similiter si æstate pluviosâ, aut minus calente aère, semina cerealia substantiâ gummosâ fixiori & acidiori turgeant, futurum ut labefactatâ digestionem & alteratâ fermentationem naturali, diversi generis ac omnino heterogenea falsa vel in primis viis vel in sanguine germinet. Liquores ardentiores, aut vinum generosum nimîâ quantitate haustum, aut acidum, aut dulcè, aut tartareum, (hæc omnia) febrilem fermentationem accendere valent, proditiisque diversi generis falsis sanguinem dissolvere. De animi Pathematis notum est quod amor, desiderium, & gaudium, cordis & sanguinis motum accellerent, ut & odium, timor, & tristitia, eundem cordis & sanguinis motum cunctentur præ majori aut minori spiritu animalium fluxu in nervos cardiacos ab impressione objectorum aut vestigiis eorundem cerebro insculptis; undè liquet ex inordinatis animi motibus ac consequenter cordis pulsationibus & alterari fermentationem sanguinis, novoque concursu salium falsa etiam diversi generis, fermentaque febrium malignarum coalescere, atque ita Variolis corripri, anxietate, tristitiâ, aut timore percitos non rarò observamus, nisi forte malueris quod in his animi & cordis motibus sanguis alterationi & impressioni æris magis pateat, minùsque connivet ut cujus motus languidior est. Vigiliæ & motus, sanguinis texturam dividunt, partes aqueas & subtiliores dissipant, undè salèdo totius massæ & falsorum concretio ac tandem sanguinis liquatio. In quiete & somno nimium protrahito torpet & sanguinis & cordis motus, inraffantur humores, subsidentque & coeunt invicem inertia ad motum salia, undè falsorum sanguinem colloquantium proventus.

I V.

QUANTUM à febre malignâ periculi impendeat inde collige: si enim fermentum falsum constanter ac pertinaciter hæreat & unâ vehatur cum sanguine, necessarium est ut magis ac magis fermentando solvatur & colloquatur.

donec, solutâ compage principiorum sanguinis, ejusdem motus omnino sufflaminetur: sic observantur exsanguia vasa in cadaveribus Variolis aut aliis malignis febribus defunctorum. 2. Quoniam fermentum falsum sanguinis æstum ac turgescentiam fovet, futurum, præ compressione & inflammatione vesiculatum pulmonarium aut texturæ cerebri mollioris, ut alterutrus aut utriusque compages collabatur, atque apoplectico insultu (aut suffocati) pereant ægotantes. 3. Quoniam sanguis & limpha eam salsedinem contrahere, quâ textura fibrosa partium solidarum quas alluunt abradatur atque solvatur periculum inpendit à sphacelo. Metuendum denique nè, sulphureâ sanguinis parte divisâ, salia fermentativa febrilem æstum foveant quò corpus emaciatum contabescat; eò autem majus periculum inpendit, quò febris gravioribus symptomatis stipatur; ut si, V. G. pulsus parvus & intermittens concurret cum syncope, sopore, & virium prostratione, delirium cum tendinum subsultu, pulsu duro sive magno sive debili, dolor lateris cum singultu aut cephalalgia, urinae crudæ aut limpidæ cum ariditate cutis & inæqualitate pulsus tum penès magnitudinem aut celeritatem; vomitus cum cardialgia aut diarrhæa, cum sudoribus colliquativis & stillicidio sanguinis per nares aut per alias vias: hæc & similia pessimum portendunt omen.

V.

TOT tantisque periculis occurrendum; & quoniam vel cerebri vel pulmonum inflammatione ut plurimum hujusmodi ægotantes intereunt, nec citius inflammationis quancumque partium corporis periculum averti possit quam venæ sectione, quâ, imminuta sanguinis moles liberius per vasa fluit, nec stagnat, nec irrumpt in substantiam partium molliorum, liquet hanc vel ex primâ febris invasione celebrandam esse, ac denud iterandam præ copiâ sanguinis aut ejusdem æstu, aut sanguinis & humorum crassitie, & quoniam de tractâ fermenti parte unâ cum sanguine in ipso primo febris obortu, & antè solutionem sulphureâ substantiæ sanguinis, minor in totâ massâ fermentationis motus excitatur, futurum ut à residuo in vasis fermento, minus quoque colliquetur, atque aded venæ sectionibus à principio morbi febrilis æstus citius refrænetur, quæ quidem venæ sectiones in progressu febris non sic feliciter succedunt, postquam fermentum cum sanguine devolutum principia ejusdem fermentativa in motum egerit, solutis staminibus sulphureis quibus salia vincebantur; cum verò minori copiâ sanguinis vasa regurgitent, minus quoque viscerum colatoria & cutis glandulas ab irrigante sanguine comprimi & angustari necessum est, ac proinde humores magis discretos tum per habitum corporis, tum per alias vias facilius secerni, unde pacatior sanguinis motus. At verò cum sanguis præter mensuram & certam quantitatem extrahi non possit nisi vitales functiones collabantur, residuumque fermentum in massâ superstitè (utcumque modicum) hanc perpetuò fermentando eliquat, necessum est ut minori sanguinis dispendio reliquum fermenti ejusdemque productum foras eliminetur. ergo vel sudorificis remediis optis est vel Emetico-catharticis. Verùm sudoriferorum usus minus venæ sectionis indicationi favet, quâ sanguinis æstum compescendum & deplenda vasa contendimus, hæc enim non nisi majori totius massæ fermentatione, sudorem aut diaphoresim promovent; & quoniam massâ sanguinis & humorum peratque rarefactione partium plusquam mole & copiâ vasa ingurgitat mollioresque partes, cerebrum & pulmones comprimit, earumdem partium inflammationis ex sudoriferis periculum inpendit, quantacumque humorum copia per habitum corporis excernatur ac continuò dissuat; etenim spiritus salino volatiles aut sulphurei quâ vi fermentationem

sanguinis urgent, tùm concursu proptio cum principiis sanguinis, tùm evoluti-
 one salium fermentantium, eadem cordis pulsationes accelerant, sanguisque non
 eadem proportionem præterlabens extrema arteriarum capillarum quâ à corde
 truditur, in iisdem aggeritur & ad dehiscentiam cogit, stagnatque in substantiâ
 partium, quin & excrementitii & recrementitii humores turbinato motu ma-
 jori confusi minùs facillè extricantur per compressa alioquin glandularum Cola-
 toria secernendi: hinc cerebrum & nervi solitâ spirituum copiâ defraudantur,
 viresque potiùs collabuntur quàm refocillantur volatiliu usu; imò verò fer-
 mentativo Cardiacorum motu tùm in primis viis tùm in sanguine, fervidior sale
 & sulphure Chylus novos fermentationi sanguinis addit stimulos, partesque
 salinæ aquearum discessu in crassiores moleculas coalescunt, tantòque magis cau-
 sticæ, ac fibrosæ sanguinis partiumque solidarum substantiæ dissolvendæ aptiores
 evadunt, quantò majorem molem adeptæ sunt; ergò ad secretionem fermenti
 febrium malignarum ejusdemque producti Emetico-cathartica in subsidium ad-
 vocanda sunt; illâ enim humorum excretionem quam promovent, fermentum & pro-
 ductum morbosum magnâ ex parte & leniori motu auferunt, tutiùsque vasorum
 plenitudini consultum videtur, ac sanguis defæciator alacriùs liberiùsque per
 vasa fluit, excrementa & recrementa deponit in glandulis, uberior succedit trans-
 spiratio, tantòque feliciùs quantò magis Emetico-catharticis compefcitur fer-
 mentatio sanguinis, & quoniam ventriculus appensusque intestinorum ductus,
 febrilium fermentorum fomes colluvie humorum pravâ per vomitum exonerat-
 ur, hinc subdulcior Chylus emungitur per otificia venarum lactearum sangui-
 nisque effervescentiam magis ac magis temperat; demùm partes Mercuriales
 Saturninæ Antimonii ac sulphur quo intimè vinciuntur, falsioris indolis hu-
 moribus obtundendis aptæ videntur, quâ oblungâ & tereti partium figurâ & pli-
 catili substantiâ, quâ soliditate metallicâ aut aciditate vitriolicâ summè diffusibili,
 haud absimili modo quò spiritus aceti saturni imprægnatione, hebetatur. Huc
 quoque collimant quæ mucilaginosâ substantiâ acido miti involuta & phlegmate
 copioso luxuriant, qualia sunt oryzata, hordeata, emulsiones ex seminibus fri-
 gidis &c. hæc enim vel phlegmate suo diluere salia fermentativa sanguinis, vel
 eadem tomentosis partibus intricare atque aded totius sanguinis æstum compe-
 cere valent, sed quoniam fermentum febrium malignarum ita quandòque
 furit ut etiam sexies iteratâ venæ sectione non minùs vigeat febrilis æstus cum
 pulsu magno, vehementi, ac duro, & cum delirio, periculumque exacerbationis
 febris ab Emetico impendeat, tutiùs consultum videtur tunc laudanum exhibere
 quod levi sulphureæ substantiæ sanguinis divisione & partis aquæ proventus ube-
 riori salia fermentativa temperare valeat, quæ magis effervescent Alexipha-
 rmacorum usu.

Ergò febribus malignis minùs tuta Alexipharmaca.

Domini Doctores disputaturi.

M. Joannes Baptista Mongin.

M. Joann. Claud. Adv. Hel-
vetius.

M. Joannes Cordelle.

M. Alexand. le François.

M. Salvator Cluscard.

M. Antonius de Saint-Yon.

M. Michael Procope Con-
teaux.

M. Claudius du Cers.

M. Joannes Robert.

Proponebat Parisiis JOANNES BESSE, Petrocorensis,
 Baccalaureus Medicus. A. R. S. H. 1711.

Apud Viduam Francisci Muguet, Regis & Facultatis Medicinæ Typog.